






沙河逸老小稿卷六

祁門 馬曰琯

人日集山心室問訊篠園梅花用東坡和秦

太虛韻

山鬪雲根梧據槁臘味浮蛆瓶盡倒欣逢涉七古  
靈辰莫把流光故相惱主人愛客客情歡研北花  
南詩意早草堂曾否動橫枝入手東風誇最好何  
況先期雪兩番苔徑籬門休便掃此君耐冷石橋  
寒雪格孤清梅格老點燈回憶十年前蜂蝶南園  
亂春草題扇書裙更與公白首重吟對晴昊





癸酉上元聯句

頻年詩句酬佳節瑄曰又設壺觴聚故人張世進風景

不殊明月夜方士山齋依舊早梅春馬曰鄰家歌

管燈前沸閔我輩談諧醉後真陸鍾如此元宵堪

記取張四白頭相見鎮常新樓

花朝日過環溪

記得隔年遊花裏泉聲響今日遇花朝復坐溪橋

上

照水寒雲一片吹香晴雪三分空亭儘容月色繞

屋還多此君

窈窈清鐘出寺來行春底用上層臺陸郎舊有梅

花課放翁邀得香風入酒杯

過湖和恬齋韻

前年車洛水凝渡今日孟城雨泊邨柳岸漁舟牽

短夢梅花燈影憶柴門忽從冷處逢詞客欲解愁

時仗酒尊且共蓬窗坐煙水須知岑寂勝於喧

和息翁留別原韻

文宴追陪數時操几杖從翦燈話春雨得句倚寒

松林壑便幽趣詩書養道容他年雲靄靄能不憶

高峯



懷竹町對鷗

西溪梅信蚤北郭酒人多故里容疎放閒身足嘯  
歌一番春雪盡兩地塞鴻過衰髣兼離緒相思奈  
我何

過舍雨亭

荒園鋤一畝草屋架三椽待得桃繁日來吟雨後  
天寺傍沽酒巷門外捕魚船定有穿花燕低飛夕  
照邊

舍雨亭補種桃花沈勉之太史同作

碧桃藥綻看如霧縛箇茅亭短墻護香逕還憐紅

影稀添種東闌三兩樹高低橫臥倍天斜油菜紛  
披更著花燕子低飛連暮雨柳絲輕拂帶朝霞春  
風可是銷人恨多處花枝能壓鬢榆錢買得淺深  
栽一飯胡麻飲清醞映竹穿沙繞寺門浣花牋紙  
染深邨留賓盡日恣遊賞重疊風前笑語温  
環溪飲罷復步桃花下

攜壺良夜繼清晨月色燈光也戀春更謝東皇憐  
客意一絲風不上花身

西疇看牡丹效長吉體

東風短夢迷香路藕絲水月楊花妬喚醒春魂語



不聞蟠花膩葉斜陽暮陰陰翠幄籠朱竿呶啞轉  
轡牽井寒紫囊紅襪異凡骨謝家小院圍檀欒依  
微曉氣青氤氳細翦湘裙貼彩雲凝煙滴露酣朝  
酒零落殘芳嗟白首

暮春卽事作吳體一首

雨雲晴雲境屢遷斷霞續霞花爛然短艇偃荇春  
水岸隻輪碾草斜陽天蜀泉旋煮瘦煙裏剡藤共  
擘幽情牽剪燈僧院風乍起落英一片當歡筵

南圻以自製洞庭春武陵春見惠率賦

香傳縹緲咸池水色泛氤氳洞口霞得隴可容兼

望蜀攜壺來賞殿春花

有名品芍藥數十種供之曲房爲他處所無

湖上以落日放船好爲起句

落日放船好平堤水一灣雨涼高柳淨沙軟睡鷗  
閒且自憐清境何須惜老顏晚來明月上仍唱棹

歌還

是日各成棹歌四首

邀王孟亭太守湖上因雨不果集小酉別館

次見東原韻

三十六陂煙水濶小秦淮畔約題詩溪橋喚棹鷗  
先覺古寺汲泉僧未知琴韻棋聲隨處好白鬚朱  
烏坐來宜莫緣風雨孤清興也有琅玕傍水涯



有所思

我所思兮在菰蘆愛而不見心鬱紆風吹庭角長  
靡蕪夜夜涼月沉高梧琴亦不復彈酒亦不復酤  
思佳人兮轉愁予一簪秋髮頭不梳江水浩渺山  
模糊夢亦不到將焉如

初夏沈歸愚先生在過行菴

滿簾飛絮一園苔慚愧高軒北郭來脫畧誰知踐  
台斗輕便還擬躡崔嵬先生來年有鴈  
岩廬阜之游論詩經案  
分題目話舊林陰駐酒杯雲鶴風姿松品格知公  
原是列仙才

城南看芍藥歸愚先生同作

垂柳陰中曲徑幽梢頭繭栗數揚州留春未信春  
留得飛過一雙黃栗留  
不矜濃豔不誇繁依砌蒼苔畫亦難雲點花心霞  
染色肯教金粉泥闌干  
花事今年開較遲開遲端為索題詩城南裏裏香  
風細坐到翻堦日午時

集小漪南觀荷

含雨更添花意態欹風尤見葉精神半潭白水鷗  
盟舊一樹綠楊蟬噪新靜裏詩歌存節物閑中景



象得天真冷香又到田田硯研江老卻凭闌幾許

十餘年來荷亭宴集者如復齋天人門薏田環山樊榭皆先後下世

晚坐兩明軒

疎雨颯然至小軒清且涼吟無東野窘飲少次公  
狂荷葉晚逾翠鐘聲遠更長泠泠秋竹底催我著  
衣裳

獨往禪智寺

人來鳥散午鳴鐘步履行吟繞梵宮叢竹蕭疎明  
月上一亭吹盡暮田風

秋林覓句

霜樹有妍色商飈無俗聲況在山水閒能動詩人  
情拄杖石橋滑踏葉秋衫輕申此獨往意得句多  
寒清調高時一唱直與天籟并乃知千秋業辛苦  
非凡營

霽堂將返澄江

晤言何杳杳不晤十年矣錄別太匆匆顧我年非壯多  
君道益充衝寒白浪裏把卷翠微中心迹憑誰託  
高飛有斷鴻

平岡秋望在天寧寺方丈後

原野帶秋色出郭多所欣遊目不在遠自然少塵



氛蜀岡延素靄山光沉暮雲清氣一朝集曠懷千古分具公支許流文字無羶葷復此遂登眺倏然麋鹿羣

秋荷

蓮葉蕭疎蓮子空水雲多處又西風餘香冉冉搖秋岼冷翠亭亭閱化工一段榮枯鷗夢裏幾人吟賞雁聲中障暉補衲休輕折留聽深宵雨半篷

客有以虎跑白沙二泉餉香溪太史因邀同人共品各賦七言古詩一章

新冬撰日招同儕丹楓黃菊羅清齋主人生性愛

茗飲水味甲乙懸籤牌有客適自錢唐至投以名泉各一器白沙虎跑遞煎烹風味甘寒孰軒輕當年七水傳又新鴻漸茶經更討論嚴灘每試東甌盃瀑布曾傾卞供春二泉未見高賢記天地精英寧久秘太史雙瓶冠六情詞人十詠矜三昧爐烟竹裏翠如絲紗帽籠頭看煮時伯芻蘇廩今誰繼琴語山心自品之

竹西亭寒眺

瘦竹已娟娟虛亭有數椽嵐光出遠樹帆影落平田斜日憐新構高唵入暮天樊川魂在否可得起



寒煙

送陸茶塢返吳門

離情值衰老不似少年時寒雨一尊綠青燈兩鬢  
絲明明梅有約默默雪相期除是鷗盟舊傍人那  
得知

題文待詔石湖畫卷

碧樹蒼煙筆斬新菰蘆深處有垂綸衡山可是無  
心畫茶磨山頭日幾巡

開圖猶憶廿年前月上斜橋冷畫船諸老凋零劇  
惆悵那堪重問石湖仙辛亥年同遊者何小山徐  
二友王支山諸先生俱下

世

哭高西堂

垂髫交契失高賢傲岼夷猶七十年白袷慣傾花  
嶼酒青山只取研田錢兩家老屋常相望一樣華  
顛劇可憐同調同庚留我在臨風那得不潸然

甲戌上元聯句

高館張燈酒復清汪玉年光流轉倍多情瑄曰玉山

雅會人如舊張世金谷遺音句早成馬曰無月也

珍三五夜陳章當杯不計短長更閔華若為吹得浮雲

散陸鍾擬借春城管笛聲張四



渡江二首

三年前上瓜洲渡酒榼詩瓢二月中今日迷濛煙  
樹裏依然微雨滴孤篷  
水濶雲多又渡江晚風淅淅鳥雙雙莫教紅板船  
輕放容易青山得到窗

雨後湖上看落梅

小謝輕埃濕漸消一湖新水暗通潮春懷正爾相  
料理又逐東風過野橋  
幾處籬門傍水開舍風瘦篠碧於苔疎花一片知  
人意吹到吟箋便不回

千株楊柳萬株松松下分明雪一蓬消得遊人幾  
回醉香魂故故惱衰翁

春日陪雅雨先生登竹西亭

亭子闢蒼苔輕輿看竹來鶯花連上日雲樹入深  
杯試茗寒泉汲尋碑佛閣開榜書增勝槩吟罷復  
徘徊

雨後過環溪

春陰霽卽佳况茲積雨後良朋隔宿招厚意詎可  
負溪光冷似雲花氣濃於酒亦有數峯青迢迢入  
窗牖愛翫復驚心韶華欺老醜不樂欲如何一笑



杯在手

題慶遠守查恂叔修復黃文節公詞堂記後  
雙井黃公古君子節義文章彪信史幾回遷謫赴  
炎荒三載宜州終老死木落江澄見本根爐香隱  
几道心存當年鍾乳詩留卷此日龍溪水抱門龍  
溪之水供齋沐遺愛桐鄉敦薄俗煙雲閣遠失前  
規蘋藻祠荒誰繼續賢守清風迥絕倫拋梁頌罷  
曲迎神辦香直下涪翁拜南北山頭萬古春

東綠淨老人

廣陵耆舊多零落賴有夫人作典型風雨一燈猶

讀史蓬蒿三徑更傳經吟壇自足張高幟壺教還  
堪繪曲屏媿我迂疎溷塵俗可容問字到軒亭

和商寶意郡丞舟次見東原韻

轉粟歸來櫻筍天吟詩命酒驛橋邊柳絲牽拂青  
雲夢花片勾留夜雨船歲月駸駸官裏過情懷落  
落卷中傳時讀君衍餘綠波發艫諸集卽今鷗影蓬窗底絕類  
江湖一散仙

四月七日雅雨先生雨中招集蘇亭

鈴閣風清暮雨稠曲闌幽砌復追遊牡丹纔放兩  
三朶竹葉時傾四五甌論世定教徵信史衡文直



欲邁前修

坐閒論史閣部往事  
暨書院文藝工拙

此來詎為看花醉

花亦人閒第一流

雨後池上

主人幽意多一雨塵事屏新晴俯曲池五月袂衣  
冷雲葉互相鮮水花自為影魚樂我亦知得與清  
流永

五月十日漁川訂遊竹西是日雨憶同人必

集行菴因于曲阿舟中寄柬

想見虛庭研席分出墻煙篆妙香聞黃梅雨過表  
初夏翠竹風來散薄醺未必重延穿樹月也應遙

望隔江雲蓬窗底事消岑寂一卷清吟杜司勳

甲戌夏六月茶塢沉疴甫愈鼓興渡江泊舟

之頃復爾委頓不七日而奄化行菴傷其  
旅魂蕭索舊侶凋殘為詩二章哭之

衝炎移疾自吳門生死由來有數存雙樹風清歸

淨土一樓鐘杳悟根元

病中曾云此  
來當有夙因

淚枯弱子終

天恨響助哀蟬落日昏愧我江關為地主不令談

笑返家園

往年送別每銷魂今日逢君便愴神尚冀聯吟從  
結夏詎知稱藥不回春半生交契成零雨一路淒



涼有故人彌留之際猶念西園先生不寘扶觀煙江重喚渡可憐  
江水亦酸辛

竹岡散步分得因字

微疴苦沉滯積抱無由伸平岡一登眺瘦竹連秋  
旻衣輕碧雲入杖瘦野色分以此契禪味亦復忘  
聲聞涵虛易為感寓寂知所因晴霞斂天末高處  
仍逡巡

荷亭卽事

籬門窄窄板橋偏波上鴛鴦樹上蟬酒罷亭空人  
散後滿身明月一池蓮

題王履若雲峯茅屋圖

秋雲冒空山秋樹倚籬落中有秋心人風味太古  
若畫師本東吳不弱文氏學卽此成臥遊可當專  
一壑

秋園得白字

積雨兼負疴荒園疎履迹今朝緣客來秋氣落吟  
席感此時序遷彌歎鬚髻白日入晚涼生高梧風  
策策

行藥

久闌詩酒興行藥到閑廳雨過水痕白天空雲葉



青秋花駐顏色涼吹豁心靈歸凭烏皮几重繙內  
外經

題徐昭法先生吳中名勝畫屏得上沙

先生妙繪事自寫幽人宅流翫仰高踪恍似舊遊  
歷激激秋澗清皎皎寒沙白逸致出肺肝都無筆  
墨迹我昔遊此閒山鳥喚吟屐草堂拜木主荒榛  
埋四壁歲序寒暑更人世風煙隔今復見茲圖臨  
風三太息

水邨同張嘯齋作

抱沙兼映柳寒碧四環周漁港多支屋鷗灘半倚

舟晴嵐隔岬渡遠火帶溪流時有書聲出蕭蕭蘆  
荻秋

聽雅雨先生談塞外風土同人共賦

冰霜歷盡龍荒外節槩全憑心眼大官齋餘暇卽  
延賓畫戟清香談出塞是時秋暑尚炎蒸滿坐渾  
疑風雪凝白草黃沙飛鳥絕頑山黑水劇心驚胡  
鴈有家遷客痛岫雲克遂還鄉夢太平曾譜十三  
詞杭靄西邊餘酒甕先生一飯不忘君注易焚  
香幾夕曛而今重看揚州月凍破梅梢卻是春

出塞集中句也



荷亭

荷亭綠水隈亭上小徘徊涼引鷗飛下香邀魚戲  
來輕風萬葉淨斜日一花開只取襟懷淡何煩更  
舉盃

秋寺

秋寺白雲封寺門秋幾重疎鐘連暮雨清梵咽寒  
蛩葉墮憐身妄香銷任客慵石房聊徙倚澄澈四  
山空

過彈指閣訪朱稼翁

鴛湖詩老至秋日寄僧廬風起書籤亂雲歸佛閣

虛君應理鉛槧我喜得依於促膝涼陰徑槐花一  
寸餘

風雨渡江以潮平兩岸濶風正一帆懸平字  
分韻得潮字

為有棲霞約重來趁晚潮秋空江面濶風橫雨聲  
驕病骨淹三月吟情憶六朝往遊仍幾輩零落不

堪招

謂樊榭環  
山諸君

龍潭道中

舟停晨夢醒路已入龍潭葉脫半巖碧潮平一鏡  
涵賞心應有託望遠自能諳遙指蒼然處煙雲繞



石龕

遊南澗歸宿翠微菴

望山東景升入山西日落挈伴續遊蹤天清試芒屨雲巒彩翠收絕澗奔濤作偶見采樵人如逢舊猿鶴老僧具伊蒲賤子欣茗酌晚風巖桂香予亦返佛閣

由北澗至天開巖

沉疴力苦衰見山猶稍稍草木發真香泉石生靜悄一步一徘徊涼露滴清曉所欣身無事暫得恣幽討巖深秋氣多塵遠俗情少北至天開巖長風

吹浩浩

登石梁望大江回憩霞心挹珠而返

飯罷復入山石路一僧導攀躋眷嶽崎滑達怯奔峭深松內蔽虧斜日外照耀大江舄下流隱隱見漁釣清鐘迎竹策暝煙颺茶竈重來指後期嗟哉坐年耄

坐紫峯閣

閣  
礪底流泉鳴窗前桂花落把卷坐蕭晨一峯對高

寂歷四無聲祇有風吹樹幽鳥忽飛來驚我塵夢



去

夜雨

夜雨颯然至更殘點滴稀松根寒溜急枕上道心  
微清徹離言說蕭寥驗氣機人生幾回聽來日不  
須歸

山中雜詠

不見六朝松猶存六朝寺古塋劫灰餘上有開皇  
字

樹  
愛古尋禹碑落葉欲無路何日蓋茅亭來看丹楓

涓涓線溜泉淅淅幽修語墜石激奔流令人想春  
雨

聞說白雲菴舊是徵君宅可憐江令君無處尋遺  
跡

房房剪木瓜處處截天竺劈破石榴漿點茶翫金  
栗

上有風嶺松下有霜田稻欲借壞色衣將於此中  
老

斷鉞吟

飲冰啗蘗志老彌堅一經教子抱恨悁悁一解風



雨清燈寒雞喔喔紉鍼補綴中夜痛哭二解斷機  
警身斷鍼刺心研穿筆禿績學資深三解維李有  
母維李有子千載而下載之彤史四解

秋草

草生零露後縱綠亦含悽廢館門長閉寒原日易  
西蛩殘難掩斂蝶倦尚萋迷愁絕衰顏對蕭蕭髮  
與齊

竹西亭登高錢坤一太史沈學子上舍同作

得笑字

出郭眄層岡竹西恣遠眺氣肅俯晴空天清延衆

妙隔江山影重吟席煙帆到旣愜素秋心兼喜遇  
同調所嗟鬢髮衰臨風怯欹帽斜陽木葉飛斷渚  
賓鴻叫緬懷杜司勳醕酌寄兀傲嘉辰不盡歡恐  
被黃花笑

竹閒亭

蒼翠一亭深清陰滿竹林密教涼意足低避白雲  
侵豈引山王興聊存支許心蕭蕭七峯畔常此助  
秋吟

甲戌初冬同人集蟬書樓重觀行菴九日文  
讌圖距今星紀一周不勝歲月遷流友朋



涓謝之感各系以詩

十二年來一霎過空庭曾記寫煙蘿題詩作畫憐  
清讌憶舊懷人感逝波雲樹依然時寂歷尊罍不  
改意蹉跎燈前叫斷西風雁零落黃花也不多

題汪敬亭君子堂圖

堂額舊係文待詔為沈石田題

竹裏構茅堂數間幽且敞昔年曾獨遊蒼翠落夢  
想新秋示我圖紙上百泉響清流曲復渟白雲滃  
以養中有擘窠書縣額見嚮往兩賢靜者流出語  
無慨慷因知異代人同調若儔黨輕煙籠月吟細  
雨舍風賞林外對青山林中呈色象幾時叩籬門

攀蘿還一上

乙亥上元聯句

佳節天涯喜盍簪

朱稻孫

山齋四度復聯吟

日地分

吳越皆知已

張世進

詩壓齊梁是雅音

陳章

春月初圓

花照夜

馬日略

清歌不斷酒盈襟

閔華

燈前底用看雙

鬢

陸鍾輝

行樂年年共此心

孫稻

落燈後一日飲梅花下

過卻燒燈意態閑輕雲閣雨烏關關風懷留得些  
些在且對梅花一解顏

寂寞冰魂苔蘚滋報開剛及五分時從今開到十



分日一日酬君一首詩

邀吳又枚孝廉錢壯猷大令行菴雨中看梅  
小徑竹連苔梅花冷淡開煙光侵幔薄風信逐香  
迴忽作稀疎雨頻傾漱盪杯莫教容易落留待客  
重來

春日陪雅雨先生泛舟平山看梅

昨日雨今日晴保障湖頭春水生波光澹沱蘭橈  
入楊柳濛濛漸放青松根殘雪在竹杪暗香橫翠  
羽啁啾聲不斷冷雲十里花冥冥倚闌山氣接握  
麈茶煙起乃知樹美政文字時料理船舫暝憂繫

沙尾不用清歌傳皓齒琴心三疊淡無言淨洗鉛  
華嚼冰蕊追廬陵繼玉局詞翰升堂真賞足玉梅  
一路點風襟日望看花向巖谷

花朝前一日讓圃看落梅

為有梅花約經旬倦眼開如何修竹裏不抵避風  
臺一半春將去多情客共來還憑清夜月流影照  
深杯

出郭看殘梅分得花字

生怕飄零盡行吟到日斜又來山鳥路重過野人  
家密竹香仍聚輕雲影半遮從開看至落端不負



梅花

賦得一片花飛減卻春著老書堂同作

惜春祇願花常盛無奈花開易落何開日景光猶  
見少落時消息不須多初隨風蝶一片下能待遊  
人幾度過欲倩韶華還小駐人生那得魯陽戈

和西疇雨中見東原韻

春寒春雨夜連朝郭外桃花已拆苞著屐何人招  
酒伴堆牀鎮日坐書巢急思牋疏補天漏底用為  
文解客嘲半月昏昏成短夢蘚紋蝸篆遍堂坳

同人集抱山堂東泝江太史

惟公髮短興偏長詩課朝朝不厭忙顧我每吟春  
水曲邀人同集抱山堂茶煙裊裊晴窗碧梅蕊疎  
疎小院香何事雲箋空寄與松風塵尾隔斜陽

次日集山心室復疊前韻

節過花朝日正長高懷閑處自成忙憐蜂抱蕊穿  
芸閣看燕營巢上草堂身健不妨重命酒詩清何  
事更憇香年來得遂追遊樂春雨春風總豔陽

雨過西疇看牡丹二首

地勝天多惜花繁客屢期肯因風雨阻直是性情  
癡色已侵油幕香應泛酒卮三年重一到草木有



心知

春是昨朝去

時立夏  
之次日

鳥仍深樹啼繁華茅屋底清

潤竹林西塵事自然屏詩魂轉欲迷朱闌收一片  
愁思草萋萋

懷謝山

甬東人去後不復寄雙魚豈是忘同調應知臥舊  
廬三春憐痼疾一枕戀殘書風雨江湖隔相思雪  
滿梳

春暮同竹町玉井半查泛舟湖上及半而返

歸憩行菴卽事三首

午餘睡起趁斜陽買得烏篷七尺強幾日不來風  
景換榆錢吹過藕花塘

殘桃猶賸數枝紅筍轎香車不避風偏我遊情容  
易倦管弦拋在石橋東

繞廊嫩綠漸低迷偷得閒身且賦詩莫把春愁浪  
堆積四人鬚髻總如絲

息翁復至邗江仍用上年喜晤韻

又向詞壇角長雄腕公山勢等龍從支筇貌古心  
逾少落筆神完句掃空燕語丁寧當首夏棟花開  
謝尚東風情知不作三年別歲歲尊前一笑同



五月四日西疇詩來乞貓次日口占繼和

筠籠攜去小烏圓珍重新詩作聘錢乳汁斷來猶

戀母魚餐足處解窺筵高齋正值戎葵放令節應

教綵線牽何尊師有戎葵太湖石貓圖牙叻養成

能禁卜護君書帙縱君眠

雨後江行

雙槳破朝煙空江紅板船蘆深涼蛤吠柳重老漁

眠青靄望無極白蓮吟有緣時有事於織山沙頭聊小泊

潮水落平田

沙河逸老小稿卷六終

懈谷詞

祁門 馬曰琯 秋玉

百字令

自述

半生情味歎飛光激箭流年隨手踏遍槐花成底

事蠟燭三條孤負洗墨池荒畫看人老蕭索閑門

舊添丁詩句玉川何日纔就 贏得玉柱金庭銀

濤雪屋湖海籠襟袖回首東華塵土夢布襪青鞋

還又桑柘騎牛滄浪吹笛沮溺真吾耦從今以往

樂天惟是歌酒



木蘭花慢

秋帆

展新蒲數幅喜無恙入空濛和敗葉爭飛冷雲齊  
渡潦水遙通煙籠幾層浪裏傍蘆花欹側過青峯  
黃鶴題詩暮雨垂虹吹簫西風孤篷兩岸掠丹  
楓遵渚聽征鴻試相尋賀老夜深明月載酒江東  
秋窮客程倦矣挂愁心木落正霜濃卸處日斜荒  
堠到時夜半疎鐘

憶故人

樊榭歸里嘯齋買舟偕往作西湖之遊相

隔彌月悵然有懷

竹杖芒屨素心乘興西湖去吳峰越巘最宜秋剛  
與潮相遇山館憶君幾度待歸帆歸來恐暮西  
泠攜酒東郭吟詩離情三處

樊榭家杭  
之城東

河傳

夢醒人靜小亭幽境蝶倦仍翻蟬殘尚咽秋意半  
上闌干竹檀欒雨聲何處喧茶鼎斜陽影射入  
文窗冷閒愁漫遣料理翠墨烏絲寫新詞

金菊對芙蓉

莎圃晚秋



曲巷閑行幽坊乍轉重來門徑猶諳記池荷的皪  
岸柳參覃前時不盡登臨興詠新詩酒污青衫而  
今秋晚蓉殘露落菊老霜酣 過眼往事休談但  
心情漸減衰鬢頻添上危亭極目無限晴嵐那能  
泛艇空濛去對煙水便擬江南淹留竟日蝶依莎  
砌蛩近湘簾

探春慢

綠展平波青浮遠岫記得年時春早乍說收燈又  
聽賣薺景物暗催人老待少停遊屐便燕語鶯啼  
不了試來曳杖荒邨野梅香破多少 隨意踏尋

芳草問次第花風幾番吹報鄧尉溪橋孤山水寺  
是我向時曾到舊友重逢處訝雙鬢而今都皤買  
取香醪風前同寫懷抱

如此江山

集平山堂

醉翁去後風流歇春風僅餘楊柳碧葉移香紅芳  
薦飲還憶當年歌酒文章太守看壁上龍蛇墨痕  
飛走極目雲平五州煙樹帶晴岫 清鐘聲出古  
寺問棲靈堦影今日存否倚檻聽松分泉淪茗且  
共閒消清晝幽懷試剖歎白髮重來闌干依舊一



片斜陽莫教杯去手

相見歡

時山館牡丹將放適西疇臥疴初起喜見  
過花下相留竟夕因譜此解

廉纖雨濕荒階破蒼苔卻喜故人相過牡丹開  
花欲語春幾許且徘徊一片露香新豔待君來

揚州慢

雨後登康山

苔徑盤紆草堂欹側十年不上康山剽風風雨雨  
挂薜荔頽垣憶當日斯人溷跡琵琶腰鼓清議成

寃倚危闌新霽涼風添咽鳴蟬 隔江隱隱帶修

蛾時露青巒笑一簣非山女墻縈繞高出塵寰唱

到荒唐詞曲談前事幾輩悽然看殘陽西下投林  
棲鳥飛還

鵲橋仙

詠鵲尾爐

首山博采名香暗炷翠羽何來飛墮是誰銀葉遞  
更翻巧鑄就雕陵一箇 卯金遺範東宮舊事幾  
輩詞人傳播炎精灰冷迹還留好伴我秋檠倡和

予家舊藏有  
漢鴈足燈檠



河傳

南園觀秋漲

流漫平岸白蘋天重過城南舊園上塘下塘秋水  
連延綠葦閒人刺船 照影空明鷗鷺喜荷葉底  
風颺吟情起詠滄浪天一方曲廊薄衣愁暮涼

眼兒嬌

白秋海棠

盈盈冰淚滴鮫綃腸斷越嬌嬈青苔滿地涼蟾映  
戶此意難描 漢宮愁絕胭脂冷酒暈玉容消三  
秋夢短六銖衣薄銀漢迢迢

行香子

憶焦山舊遊

買得低篷攜得孤筇憶年時不負清冬斜陽看竹  
夜月聽鐘正約吟朋尋老衲狎漁翁 雨後蒼松  
霜後丹楓對煙江塵夢都空行隨鶴侶飲伴猿公  
但聽寒潮聽落葉聽飛鴻

長相思

效獨木橋體

花外樓柳外樓燕子飛時嬾下樓夕陽紅半樓  
風滿樓月滿樓一斛閑愁貯滿樓郎居何處樓



南浦

送王梅泚入都

冬冷客辭家渺江流隔斷西津瓜步交是舊情真  
淹留地早又寒風酸楚蘆花似雪鴈來何故人偏  
去回首可憐楓葉落夜夜夢遊煙渚軟塵纔洗  
征衣歎依人不許江鄉久住梅子正黃時闌干畔  
記得小樓聽雨歡娛未幾對清尊離情重數堤柳  
不堪霜後折斜日半墻誰語

明月逐人來

癸酉山館元夕用去年韻

林深煙澹梅橫香淺山樓外華鐙幾點暗窗搖影  
漸漸風吹面靜裏聲喧人遠猶記年時攜手星  
橋月觀觥心凸堂深波捲到得而今春不由人管  
坐聽更籌頻轉

一痕沙

環溪梅影

浸得春魂能瘦映得香心能透風定碧無痕寫雙  
身清到遊魚難覓寒到流雲一色倚竹更穿松  
淺波中

鷓鴣天



春日山館晚晴偕半查同賦

孤負韶光不等閒  
梅花羞澁杏花慳  
雨餘簾卷明斜日  
風定雲開見遠山  
初蝶舞暮禽還  
撲人料峭是春寒  
安排酒榼詩筒了  
同上江南鴨嘴船  
一翦梅

立夏後一日同人集晚清軒補作送春之會共賦此調

牆角餘花落瘦藤  
惹起閒情觸起離襟  
春歸幾日計行程  
鶯語分明燕語丁寧  
欲挽芳踪苦未能  
已過江亭又過山  
城閉門還復拾飛英  
茶煮孤鐺

酒煮雙餅

謁金門

棟花和玉几

殘紅埽風信  
這番吹了紫霧濛濛  
香穗小春餘無  
限好  
簷外綠陰黃鳥  
剩得茶煙輕裊  
不暖不寒  
庭院悄看花人欲老

齊天樂

送樊榭歸湖上

廉纖細雨侵衣袂  
梅天最難調攝  
苦筍過墻青苔  
上砌  
客裏光陰飄忽  
懷歸念切  
擬暫瀹茶鐺  
少留



吟篋只恐紅衣待君香散半湖月 吹簫何處濯  
髮浸空明一片銷盡炎熱喚艇邀涼凭闌覓句沙  
際白鷗凝雪那堪閒濶定驀憶山齋幾般縈結莫  
負秋窗滿林蟬亂咽

澡蘭香

午日兒童以蒲作劍佩之相戲蓋亦辟邪  
之意耳醉後因檢夢窗澡蘭香譜之聊用

遣興

根蟠九節葉隱三花獵獵弄風澗底靈苗勁處瘦  
脊抽時宛似匣中秋水正天中競翦青青含景蒼

龍躍起懸向門衡笑比離騷蘭芷 老去雄心減  
盡但解牀頭辟邪而已銀垂蒜押豔吐榴房合與  
艾枝同繫漫嘲他笑舞婆娑荆引深杯泥醉試配  
取射黍琯弓午香菰米

疎影

荷影

陂塘幾曲愛露盤一向照來清淺本自無塵依約  
凌波空裏淡痕香遠娉婷自顧羞明鏡渾不似靚  
妝朝絢夜深時素魄潛窺又逐水風吹亂 遙憶  
江南舊種悟分身淨界秋思同幻鷗鷺沙邊幾回



夢覺錯恨玉容消滅吳娃漫撥邪溪棹歌未歇露  
凝煙晚試歸來描取紅情寫上小窗東絹

浪淘沙

席上分詠得風荷

向背一池翻香散雕闌紅妝容易變秋顏水鳥欲  
棲棲未穩翠被生寒客夢落江天搖蕩吳船露  
零豈為蕪龍涎宛似羊家張靜婉撩亂雲鬢

浣溪紗

夏日湖上

垂柳陰陰繫短篷綠荷香散水雲空石橋斜界小

亭東 幾日心情傷舊雨暫時闌檻受清風一聲  
幽鳥出蘆叢

明月引

行菴為同人會吟之地年來故侶零落愴  
然於懷因賦此曲

蕭蕭禪院冷秋鐘約過從怯過從老樹疎枝幾輩  
倚吟筇風又易流雲又散徑苔裏一條條認舊踪  
舊踪舊踪總迷蒙飛斷鴻叫斷蛩記也記也記  
不起魂夢相逢纔一追思斜日下牆東鬚鬢看看  
凋落盡拚醉也把衰顏付酒紅



木蘭花慢

秋燈

漸生衣薦爽透窗眼燄初新更桐雨淒清竹風蕭  
颯一盞堪親宵分書帷乍卷向孤蛩聲裏伴吟身  
瘦對花垂硯北淡和月映籬根 懷人翦處不辭  
頻幽思與誰論況霜白吳橋楓青湘廟閃爍猶存  
愁痕枯棋半局子空敲涼影豆花邨何似煙江釣  
艇星星明滅黃昏

買陂塘

仲秋集東園

又涼颺埽除殘熱一園清氣如水亭臯木葉蕭蕭  
下新鴈挂雲初霽風日美杖短策秋原直愛遙岑  
對漁梁漲矣正釣艇纔收潮痕漸上閒共坐沙觜  
同遊輩卅載凋零有幾看花情事堪記羊燈兔  
魄渾如昨誰領冷香寒吹聊小憩歎鬢點吳霜淒  
絕難成醉餘霞散綺剩今日重來小山吟罷滿耳  
樹聲碎

渡江雲

觀文休承吳淞草堂圖因憶梅泮京師

波光搖素練空濛一片望去與雲平是誰家矮屋



竹樹參差隱約寫閑情漁菴癩舍想此中定有吟  
聲還憶起京華遊侶何日返柴荆 堪驚十年賣  
賦三載依人怕重看青鏡第一是拋荒釣手辜負  
鷗盟多時不見長橋影惹清愁兩鬢星星書寄與  
君應急喚歸舲

訴衷情

寒蛩

那堪秋去耳還聞牀下更相親忘卻麤疎聲老猶  
自怨黃昏 無氣力與誰論雨紛紛一燈如豆兩  
鬢成絲恁不消魂

臨江仙

九日環溪看芙蓉

澹蕩池邊倒影參差檻底愁紅環溪漁屋水雲空  
秋心渺何許涼思入芳叢 寒木還憐楚客拒霜  
可遇陶公重陽又是雨濛濛閒來能載酒也不負  
西風

四字令

秋雨初涼同西唐玉井坐山館紫薇花下  
濃雲半封疎花小紅良朋幾箇過從怯闌干晚風  
西窗暗蛩南樓暮鐘吹來都入簾櫳看茶煙裊



空

青玉案

畢園訪秋

涼雲閣住闌干外似做出秋情態病骨年來差健  
在廢池吹穀野田方罨著眼都如畫 小山招隱  
寒香墜鴈落吳天數聲碎喚艇支筇惟我輩碧搖  
蕉影響分竹籟幽思今朝最

憶少年

詠鴈來紅

幾番風露幾家庭院幾般顏色芳華將盡也反絢

朱凝赤 塞鴈一聲秋欲滴對秋花少舒愁寂丹  
楓將近也又怎生留得

風入松

舟宿焦山

空江歲晏記聯吟清磬一燈深梅花可復重相識  
能留客還是沙禽憐爾風前逸韻添予蓬底幽心  
長松修竹足登臨一夢冷雲侵欵眠風靜波聲  
小酒醒後滿耳冰琴舊友三年如昨霎時枕上分  
襟

百字令



送竹町對鷗歸錢唐

釀寒天氣正林空歲晚蕭蕭風雪自是鄉關縈夢  
寐枕上愁心千疊吟事輕拋歡情頓減欲說還鳴  
咽津門人至一舟同臥江月 還憶春杪重湖綠  
陰行遍波影清人骨襟上酒痕都化淚眼底風花  
銷歇斷壁猿啼立雲鴈叫四野飛黃葉贏得聯牀  
夜燈相話明滅

壺中天

分詠飲事得酒兵

清尊紅燭賈詩壇餘勇策勲三雅旗鼓定教高北

府萬仞愁城能下芳草雞缸葡萄蠡琖誰是先登  
者廚頭人醉喚醒還應驚詫 最愛酣鬪功多鈞  
爭拇戰行陣秦吳亞走入南康廳事避轉憶安西  
司馬壁上從觀壚邊卻立雨驟風馳也休言嗜飲  
此鄉也堪稱霸

花閒憶

上元前一日集晚清軒泝江太史以此闕  
寄柬依韻和之

試燈又是年時節疎梅欲破昏黃月六曲護風屏  
斜連一榻橫 新詞勞寄省小炷爐香領春到徑



峴名言  
苔新清尊約故人

唐多令

野泛

久雨滯游嬉新晴手重攜泛扁舟還叩柴扉回憶  
綠牋題句後春又過一旬期 彌望水平隄橋頭  
柳色齊人影亂驚起鷓鴣十二紅闌都倚遍竟忘  
卻日沉西

壺中天

環溪紫藤

一灣流水架小橋三折濛濛花塢翠幄陰垂香不

散透入春衫如霧密葉蜂尋瘦條蝶抱到此剛亭  
午暖風輕颺年年花下題句 況是闌角欹紅苔  
堦偎綠滿眼飛晴絮宿酒朝來還未醒幾箇曹騰  
春去雨彼鬢陀現茲瓔珞天也留人住聽殘啼鳥  
斜陽遙挂高樹

柳梢青

效許圭塘體與樊榭漁川弟半查同作

日麗花酣土風清潤到處幽探石塢支筇水邨喚  
渡沙岸乘籃 漁罾蟹斲澄潭痕一抹煙梢嫩嵐  
稻飯紅蓮莼羹碧澗好箇江南



浪淘沙

秋江晚泊時甲戌八月二十七日也

江濶晚霞高無意迎潮蘆花瑟瑟柳蕭蕭鷗鳥見  
人偷眼去飛過溪橋 沙際小停橈酒榼詩瓢更  
將清興話迢迢回首昨宵煙翠裏秋色南朝

